



Äntwert vum Här Claude Haagen, Minister fir Landwirtschaft, Wäibau a ländlech Entwécklung op d'parlamentaresch Fro n° 5570 vun den éierbaren Deputéierten André Bauler a Gusty Graas

**1) Wéi steet et ëm de Suivi vum Debat mat de Jongbaueren an der Chamber?
Wat fir Konklusiounen vun dësem Debat wäerte kuerzfristeg ëmgesat ginn?
Wéi steet et ëm d'Aféiere vun engem nationale Pass fir d'Béischten?**

An de Konklusiounen vum Debat sti Mesuren, déi engersäits op nationalem an anerersäits op europäeschem Niveau ëmgesat mussen ginn.

Op europäeschem Niveau steet d'Thema « Bien-être au transport » ëmmer erëm op der Agenda vum Agrarconseil, an hei ass et un de Landwirtschaftsministere fir op d'Kommissioun Drock ze maachen, dass d'Konditiounen beim Déierentransport verbessert gi respektiv Déierentransporter a verschidde Länner, wou d'Konditiounen net respektéiert ginn, net méi erlaabt ginn. De lëtzebuerger Landwirtschaftsminister huet dat bei all Geleeënheet gemaach an huet sech u verschiddenen Initiative mat eenzele Länner bedeelegt.

Op nationalem Niveau gouf proposéiert, méi verstärkt d'Kaalwermascht hei am Land ze promovéieren, fir net all déi männlech Kaalwer an auslännesch Kaalwermäschtereien exportéieren ze mussen.

Dat ass awer eng Measure, déi net kuerzfristeg ëmzesetzen ass, well hei eng ganz Rei Froen ze kläre sinn, wéi z.B. Infrastrukture fir d'Kaalwermascht, d'Vermaartung vum Kallefleesch (notamment och d'Valoriséieren am Kader vun engem Label), d'Genetik (Rass vum Zuuchtstéier, Produktioun vun Kraizungsbaischten). Grondvirraussetzung ass natierlech, dass Baueren interesséiert sinn, an esou eng Produktioun ze investéieren.

Wat de Pass fir d'Randbéischte betrëfft, existéiert dës schonn. All Kallef kritt bei der Gebuert e Pass vun der Divisioun "Sanitel" vun der Veterinärsverwaltung ausgestallt, wou verschidden Donnéeën (Rannerhalter, Sanitelsnummer, sanitär Donnéeën) drop stinn. Dës Pass begleet d'Béischt bei all Bewegung vun engem Betrib op deen aneren a bis an d'Schluechthaus respektiv bei d'Firma, déi de Kadaver entsuergt.

Prinzipiell kéint een schonn haut op de Pass drop schreiwen, dass dat Béischt net däerf an Drëttlänner exportéiert ginn. Aktuell ass d'Situatioun awer déi, datt, wann d'Béischt aus Lëtzebuerg an en anert EU-Land transportéiert gëtt, do e neie Pass ausgestallt gëtt, op deem de Vermierk da verschwënnt. Dofir ass dee Volet just op europäeschem Niveau ze léisen, woubäi een sech muss bewusst sinn, dat, wann d'Déier d'EU verléisst, dee Pass keng bindend Validitéit fir Drëttlänner huet.

2) Zu wat fir enge Schrëtt wäerten d'Diskussiounen op europäeschem Plang féieren? Wéi wäerten déi nei EU-Recommandatiounen zu Lëtzebuerg konkret ëmgesat ginn?

Den Ënnersuchungsausschoss vum Europaparlament, deen sech iwwert dat lescht Joer mam Thema „Déierentransport“ auserneegesat huet, huet e Rapport erstallt, deen am Januar dëst Joer vum Europaparlament approvéiert gouf.

Dëse Rapport adresséiert verschidde Recommendatiounen un d'Kommissioun, déi iwwert eng Reform vun der europäescher Legislatioun ëmgesat solle ginn. Déi Recommendatiounen betreffend d'Transportdauer, d'Transportkonditiounen grad ewéi och de Mindestalter, mat deem Déieren transportéiert däerfe ginn.

D'Kommissioun wäert Enn 2023 legislativ Propositionen vorschloen, déi d'Déierewuel net nëmme beim Transport mee och an de Betriber verbessere sollen. Lëtzebuerg, wéi och all déi aner EU-Länner, ass da verflucht, déi nei Dispositiounen op nationalem Niveau ëmzesetzen.

3) Iwwer wat fir eng Moossnamen op nationalem Plang wäert de Minister mat den nationalen Acteuren an nächster Zäit berotschloen?

Wäert et zu engem weideren Debat iwwert den Déierentransport zu Lëtzebuerg kommen?

An de Gespréicher mat den nationalen Acteuren, déi ech wäert iwwert déi nächst Méint féieren, wäert de „Bien-être animal“ och en Thema sinn. Sou sinn am neien nationale Strategieplang betreffend déi zukünfteg Agrarpolitik eng Rei Mesure virgesinn, fir d'Déierewuel nach weider ze verbesseren. Als Beispill kënnen d'Erweiterung vun der Weideprimm an déi nei geplangten Norme beim Stallbau erwäant ginn. Doriwwer eraus wäert et spëtstens zu weideren Debate kommen, wann nei europäesch legislativ Propositionen um Dësch leien.

Lëtzebuerg, den 8. Februar 2022

De Minister fir Landwirtschaft, Wäibau a ländlech Entwécklung,

(s.) Claude HAAGEN